

四庫全書

集部

欽定四庫全書

霞外詩集卷四

元 馬臻 撰

大德辛丑冬內醮禮成天師真人親奉上旨祈雪
繼沐感通謹賦七言律詩稱賀二首

金殿深沉曉仗寒鼓鐘三奏列仙班祥開寶壇玄風洽
道在清朝白日閒七御瑞光浮帝座兩宮和氣藹天顏
殷勤三獻封人祝五色雲生萬歲山

又

金史卷之四
卷四
醮罷龍樓異渥新煌煌印劔嗣金真綸音錫命期三日
奏牘傳誠走百神雲葉尚籠中夜月雪花已散萬方春
太平有象乾坤大一片丹心拱北辰

白雲歌贈友人別

白雲何處來晶晶揚長空卷舒合變化倏忽周西東出
岫既無心敢望成霖功遂令淪落姿飄泊隨天風我身
如雲亦無據五千里外君相遇殷勤不盡別時情又把
離盃送君去送君去君早歸我亦思家心力違只恐著

破慈母手中衣歌白雲雲自飛

久客

白露變榆柳滿城砧杵催故園經歲別游子幾時回且
盡山公酒難將驛使梅秋聲不可聽永夜獨徘徊

寄家書

輕別西湖十里山別時慈母勸加餐可憐寄得家書去
不道艱難只道安

易水懷古

嚴霜薄廣野天寒易水潯遊情念古昔指物傷流陰荆
卿感至德捐已重君臨餞夕風蕭蕭慷慨成悲吟依依
別故里道路多嶮嶇神勇正色厲客氣難顏侵武陽斗
筭器齧鯨喙如瘡強秦福尚綏誰使傳鳴琴良籌竟不
進匕首將何任扶光朗中憐天道幽難堪哀哉九原下
空負田樊心

客夜不寐偶成短句十首用渭北春天樹江東日
暮雲為韻

丈夫慎出處功成乃身退古人夫如何八十釣清渭
四時循化機萬物隨動息衆星紛熒熒天運齊拱北
縞素製野服誤染京華塵舊業在何處梅花江上春
男兒不得志壯心惜徂年長空起鵬鷃目送入寥天
布衾生淒寒夜夜夢歸去心恐秋風深摧殘紫荊樹
吟苦不成寐寒窗凝夜釭千古誰知心遙遙賈長江
此身如斷蓬飄蕭隨北風錢塘一望地家住西湖東
客慮千萬端長吁愁不出誰能事低眉揮盃送白日

幾欲膏吾車老眼不識路弟妹今何之蕭蕭齒髮暮
昨日家書至慰我久離羣游子眼欲斷日日望白雲

渡灤河

疎疎遠雨霽草色凌天光融雲馳疾影倦客摧中腸牛
車滌黑水回折如探湯四顧何蕭條落日心徬徨豈無
親與朋晤歎天一方物色可憐人悠揚動微芳題詩道
遠意此意何能忘

昔聞

昔聞行役苦今日客殊方窗影燈岑寂雞聲夢渺茫僕
奴忘禮數親友轉參商欲寄平安字天寒煙水長

旅興

客中白日送清樽燈下裁書眼漸昏南浦一年雲隔夢
西風萬里月當門酥凝癭椀茶膏熟火慢筠籠楮被溫
未覺情懷殊冷落終身衣食是皇恩

早春聞笛

萬里南州客離家又一年春回首舊地笛怨鷓鴣天趁

日裁烏帽尋人賣馬羈歸心憂賦役負郭幸無田

都下初春

茶樓酒館照晨光京邑舟車會萬方驛路草生春報信
御河水散客遙裝青山有夢惹親老白髮無私世事忙
想得故園殘雪後梅花開遍讀書堂

書龔彥釗畫舜二妃圖後

伊大舜之鰥下兮玉蘊櫝而藏諸堯側陋以巽位兮師
錫帝而曰俞試諸難而孝恭兮惟懋嘉績降二女于瀋

汭兮迺嬪于虞絲治家以及區宇兮始克觀于婦道咨
百辟而設居方兮胡陟南而云徂恐夙夜之弗逮兮服
盛德而靡失何昊天之不弔兮洒泣涕而漣如委重華
而莫余申兮寧逐湘流之浩淼貼天命而隕厥躬兮疇
能撫事而跼蹐悲湘筠以淒風雨兮膠淚漬而莫除蕩
恨骨而誰為依兮空馳靈於故都昔四岳以明頑嚚昏
傲兮猶烝烝而善治君今雖死而無憾兮生厥父而厥
夫懷哉若人而不復見兮終混輿而罔極孰謂九京而

不可作兮美彥釗之為圖爾有斯謀斯猷兮亦孔昭於
永世我歌既成曷從而弔之兮望雲氣於蒼梧

回南二首

家在錢塘江上春京華投老獨漂零玉泉山外雪猶白
金水河邊柳又青帽底流塵春冉冉花間行李髮星星
分明記得經游處一路吟詩寫驛亭

又

回望京城在九霄西山晴暖雪纔消人行短草春容與

馬拂香塵柳動搖老鶴心情終憶海浮雲富貴謾題橋
尚憐歸去身強健歷歷松風寄一瓢

舟次楊村

前望同舟遠不分打頭風急御河渾蹇驢無力牽船纜
行到楊村日已昏

江陵即事

孤舟分破綠連漪風滿蒲帆力半歌萬里客情空感慨
一年春事又差池鴛鴦引子窺魚網楊柳飛花入酒卮

南阮歸來渾似舊錦囊添得幾篇詩

高唐晚泊

夾馬營邊晚繫舟遙看水接汴河流
淡紅消盡斜陽影高樹乳鴉生古愁

渡御河用少陵日轉東方白風來北斗昏為韻

御河出天津浩浩流水急質哉鼓兒船
一站過三日歸心空如馳布帆風力軟
曲肱倚篷窗草岬遶船轉維舟縱晚眺
草色浮春空廣野無阡陌欲往忘西東

行行計故里未覺道路長
緬懷燕耆舊却在天一方
舟車載名利動越萬里隔
詎識玄中言若辱乃大白
聖君執大象萬方文軌同
請看金臺高英賢盡趨風
沙柳如舊識沙鷗休見猜
昔從東風去今逐東風來
驚雷過急雨夜色如發墨
夢經西津渡覺在大江北
古驛燈影薄風定沙不走
數問夜何其天空月在斗
大塊佚我老故園松菊存
湖山無變質吟詠足晨昏

舟人婦

眉黛攢愁鬢欲皤繫舟瓢水飯驢騾綺羅只解裝歌妓
看得悲歡不較多

汶上

芳草已碧色駐帆聊解顏柳花經汶水雲氣入梁山短
褐行人老長途古木閒故園饒筍蕨喜得及春還

清河舟中二首

長淮渺渺接風沙桑柘岡頭四五家自古利名爭不盡
潮生潮落自年華

歲旱沙田久廢鉏蕭條民屋盡桑樞生來不識繁華事
菰米黃蘗亦自娛

歌風臺懷古

西郊蛇斷此登臺千古風雲入壯懷海濶波濤吞楚越
秋高鷹隼掠江淮倚天劒化人何在揭日碑殘土半埋
空恨英雄留不得咸原煙草正枯荄

圯橋

昔人已伴赤松遊橋下惟存漢水流一卷素書何處在

數峰煙雨是邳州

呂梁洪

萬里長風送短篷
亂流初下呂梁洪
篙師點過鋒銍石
一片歡聲落日中

泗上

泗水東流逆棹遲
遠看春色眼先迷
岼花影直日亭午
雞在茶商船上啼

維揚寫望

東風吹盡馬頭塵空對今人憶古人不見劉安雲裏過
雨昏二十四橋春

途中寒食

行裝迢遞轉孤城一路閒吟緩客程
潑火雨晴錫粥冷落花風暖笋輿輕
感時已悟莊生夢遺俗空懷介子情
只有啼鶻解人意平蕪漠漠兩三聲

瓜洲渡驛舍

晚日依依照驛亭
悔將年鬢逐飛塵
魯連不是思浮海

桀溺從來惡問津
楚漢江聲千里接
荆吳山色四時新
詩人到處便懷古
腸斷瓜洲楊柳春

楊子江寫望

古渡風初急孤舟似浴鳧
山形開混沌江勢拍虛無
落日金焦寺長煙楚漢區
乾坤盡詩景何事泣楊朱

過京口

自慙為客久理棹及春還
醉別西津渡吟經北固山
業思青笠底詩在綠陰間
不及滄江上沙鷗盡日閒

客懷

楊柳窺煙色漸深
亂花經眼又成塵
半醒半醉看浮世
無子無孫任此身
春盡歸鴻成序少
日斜行客轉頭頻
中年未遂躬耕計
憔悴山陽笛裏人

吳中

故鄉別久語言訛
喜聽吳音入棹歌
萬里歸來心未穩
夜闌猶夢過關河

贈顛上人

越僧號顛叟遠自鑑湖來攜詩扣我門一見心顏開自
說蚤行脚見佛向五臺倜儻了不羈談笑無塵埃乃知
顛非顛俗眼徒見咍達士心地空明明本無猜詩成作
回向此道何悠哉春風亦浩蕩飛花下蒼苔

自適

人心如跳丸怒風號萬竅狙公易朝暮取舍本同調我
心用苦拙綿綿抱獨照結廬逼湖水可以足吟嘯寵辱
不復知風來水禽叫

奉簡張仲美

山川散淑氣灑灑揚芳塵眷言沂詠樂薄游及茲晨晨
出算還歸乃聞來故人新詩發麗藻叙此平生親憶昔
別故人轉燭餘十春萍蓬各異勢良覲遂無因借問今
行役幾日航江津鑑湖波不改賀監誰為鄰歲月何奄
忽事往情難陳相逢且慰意庶復全其真

題爪鼠圖

女臂狸頭不自奇桑虞翦棘化偷兒飽他鼠腹能多少

金匱要略卷四
幸是癡猫未得知

詩思

本與名言絕乾坤鍾氣清靜中收拾得閒裏琢磨成美
刺明時化幽微索至精不曾親悟入似隔萬重城

西湖晚思

日落湖水黑衆山生遠塵船回載酒客樓倚獨吟人老
態多思舊時情只貴新籬邊古梅樹開謝幾年春

送詩僧俊傑菴游越

曾共山中聽杜鵑巾瓶還問剡溪船三生石上三更月
早晚重來話極玄

拜墓

一別松楸又一年歸來拜掃一茫然老鳥下竹窺盤飮
稚子攀松挂紙錢心斷野花春色裏愁生杜宇夕陽邊
東風不管流年事只向西湖送管絃

安居

午睡覺來晚倚闌看水流柳花終日過荷葉向人浮掃

地山當戶焚香書滿樓此心無愧忤吾道轉悠悠

野外

野外蕭條景更佳牧童將犢卧晴沙白鷗長遶分魚市
紅杏深藏賣酒家倦向客程添懊惱老看春色厭紛譁
田翁也學青門隱料理荒畦自種瓜

和曹梅南見寄詩韻二首

每憶仙人蔡少霞幾番同會稚川家春光正好無閒日
又負西園一度花

閉戶誰能草太玄老來慵懶尚依然麻衣道者如相問
休道錢郎骨未仙

送仇仁近之漂陽教授

我昔萬里遊轉覺山水好歸來桑梓間凝情向故老自
從識君三十春交淡如水情相親愛君長才凌鮑謝和
光接物同常人人生會晤真難據君又之官漂陽去漂
陽地勝名士多道在絃歌閒適處春江漠漠春帆開柳
花風起如塵埃只恐文星留不住玉堂金馬待君來待

君來請看天上黃金臺

哭巖翁龔處士二首

平生師友最相知，拄杖過眉白髮垂。
老大玄英心尚隱，淒涼伯道死無兒。
驂騑絕筆堪成恨，翰墨堆床付與誰。
挂席歸來還慟哭，可憐不得挽靈輶。

耆儒行輩盡凋零，每對先生憶古人。
疊疊笑談驚座席，昂昂標格動星辰。
九原何憾遺編富，孤女無依舊業貧。
今日隴頭誰誌石，野花芳草一年春。

葛嶺言懷

湖上繁華已隔塵樓臺遺址野田春
蘇堤飛絮無多柳
洛社工詩有幾人白石取殘山粲粲
黃金銷盡水粼粼
葛公丹井依然在換却西邊舊日隣

和閑居韻

萬物隨生化簞瓢任屢空短長莊說劍得失楚亡弓機
盡心如醉言忘耳似聾已知身是幻休負百年中

寄昇元陳渭叟

白苧衣裳烏角巾，昇元觀裏寄閒身。
自離別業行經歲，每得新詩說向人。
一室圖書朝會客，滿山星月夜朝真。
可憐種杏仙翁去，孤負涌金池上春。

墨竹

墨光浮潤拂新梢，尚憶清風遶銳毫。
安得滿林生練實，鳳巢丹穴正嗷嗷。

傷曹梅南

忍君淒斷鼓盆歌，便欲相從隱薜蘿。
仕路久忘貧自樂，

好山未買事多磨
院房求寄閒家具
風雨驚飛舊壁梭
一曲陽春人不見
隴頭消息竟如何

暮春

風雨縈寒入暮春
倚闌還動去年情
淺流科斗已生脚
喬木鷓鴣初有聲
南畝歸耕無業在
北窗高卧喜心清
樗蒲一局從兒戲
已悟人間寵辱驚

寄苔溪沈玉湖

寶溪春晚柳花飛
記得停橈送別時
短髮霜侵難信藥

壯心灰盡未忘詩吳山佳麗全非舊洛社風清尚有誰
何日相過一樽酒西窗夜雨話襟期

題姚安仁南陌尋春圖

杖藜徐步趁晴光岸草無名亦自芳桃李不知何處問
青蔬拾得已盈筐

忽憶

忽憶行年五十五擾擾得失枯人腸金魚綠酒我須換
蒼狗白衣誰可量瘦梅喜浸古壘盎老態怕著新衣裳

親朋相別萬里外一字不到三年強

題鄧蓀壁所藏龔處士畫馬卷

金釘繩短駐霜蹄曾見先生手畫時精凝繭香回緊契
氣隨神變發權奇華軒欲試丹青動絕筆無傳造化私
今日有誰偏愛惜鄧公馬癖幾人知

雪夜

風急雲彤結畫陰水邊樓迴懶登臨老夫覓句愁人別
稚子開門喜雪深漁火依稀明遠渡寒鴉撩亂集空林

江山一片模糊白誰識孤鴻萬里心

葛元白年登七袞寄詩寓意就韻以和

士得佳名盡不虛曾提健筆賦閒居經行國裏當扶杖
豈向槎頭謾釣魚昔日家聲疑夢寐壯年交友盡稀疏
讀書兩眼猶如月白首長懷董仲舒

挽安人丘氏

慣承甘旨足優游八十慈親雪滿頭混沌鑿開真不變
摩耶化去佛難留梁空落月萱堂曉香轉孤燈總帳秋

惟有隣家心緒切倚門人老正闕愁

謾成

暖催花雨溼行塵脈脈憑軒欲損神閒憶少年如昨日
只疑樂事是前身黃鸝紫燕春仍好剩水殘山物自新
可惜白鷗波浩蕩扁舟老却釣魚人

永嘉包氏子孝感詩

昔別風塵際驅馳三十春存亡違故里涕淚泣高旻棄
置青雲志間闕白髮親及泉悲厚地錫類有斯人就織

從無婦揮金竟贖身生還休陟屺孝感實通神轉覺乾坤大難酬造化仁楠川耆舊在為爾一酸辛

挽葛元白二首

年登七十鬢絲垂纔別經旬病忽危死隔異途悲范式奏終流水失鍾期已無湖上重來日猶有床頭未和詩妻逸子賢人事盡難教竹杖化龍遲

老來多感病孱顏不擬先生去不還酒約詩人時共飲門嫌俗客晝常關傷心池畔新移菊瘞骨湖西舊買山

牢落西風吹別淚
楓林赤葉正爛斑

春老言情

野薔薇開花欲盡
官蝦蟆叫春無多
人生萬事聊復爾
有句不禁芳草何

偶成

穀雨聲連四月初
閉門甌石久無儲
貧憐杜甫常賒酒
老愛邊韶懶讀書
鄉里小兒相爾汝
簷楹乳雀自親疎
生生化化皆春意
誰羨簞瓢樂有餘

和友人春雨詩韻

物換山仍在春歸鬢亦華
詩來慚馬異金盡誤劉叉
林色花如綺簷聲雨似麻
世情忘已久投分老烟霞

山行有感

此聲欲發又還吞
壯志消磨入瘦藤
山北山南松色裏
一年強半送親朋

經山寺有懷故友

浮雲春色眼前生
萬事傷心布穀聲
薊子休慙玄尚白

屈平常愧濁難清鶯花世界經飄泊湖海襟期失老成
山寺無人晚歸去詩牌忍見舊題名

漁父歌

老翁家住西湖邊自從學釣四十年瓦甌酒醒炊未熟
白日過午常高眠昨朝老婦丁寧泣鉅鉤須利不須直
得魚賣錢及早歸鄉吏打門征斂急嗚呼吳松笠澤秋
水多筆床茶竈今如何

傷廢塚

春風習習吹花木千山萬山一齊綠日午諸村社鼓喧
田家小兒健如犢閒來徒步上前岡累累古塚相攢簇
荷鋤老叟向我言元是前朝貴人族貴人在時勢絕倫
後擁前遮來繡轂并吞隣土孰敢嗔回山轉水開林麓
相連崗幹成一丘斷斷雲根埋寶玉大書功德紀豐碑
直向山前起華屋子孫擬作千年計盡是老夫親拭目
星移物換水東流泉下知誰伴幽獨翁仲雙雙賣與人
留得三竿兩竿竹寒食不見紙錢飛只有啼鵲替人哭

又說東家來卜地役夫日夜喧山谷天理蒼茫不可知
後車須看前車覆

浙江晚眺

昔年吳越事并吞留得青山只斷魂落日正明漁浦渡
歸鴉遙點范家村雲分雨脚回沙溆帆趁潮頭出海門
欲問淒涼千古意鷗夷何處有兒孫

閑思二首

累石誅茅一徑開自移花木向陽栽春來可是多陰雨

漬得棋枰上綠苔

困來收起讀殘書
閒坐蕭齋一事無
學圃慣知花木性
莫教蘭蕙雜蘼蕪

西軒夕望

鄭公粉繪久寂寞
山水佳氣誰為傳
閒雲無心底不定
凍鴈失序空相憐
獨留雙塔樹倒景
尚憶高堂祠昔賢
寒煙蔓草亦自好
未須歌鼓汙天然

解嘲

與奪紛譁事事虛此身天地一蘧廬避名祇畏人心險
存道元非世法疎甌裏塵生徒好客床頭金盡謾耽書
秋聲又入窗前竹除却高眠總不如

涼夜獨吟

竹風吹獨夜危坐破愁生歲月此身老路岐何日平行
雲攬月過戍鼓雜鐘鳴多少心中事苦吟吟不成

天師真人畫小景卷

溪煙蒙青林秋色灑天地歸舟何人斯傑閣吐茫昧洩

雲展白練絕巘立蒼翠真人心虛無發穎扶元氣淋漓
一尺楮回薄萬里意嘗聞郭忠恕刻畫破精粹豈若法
自然淡乎似無味六丁慎呵護恐有風雷至

短景

短景移林影田家得暫依病牛尋日睡枯葉帶霜飛坦
蕩天公意淒涼客子衣窮通應有定未必計全非

霞外詩集卷四

欽定四庫全書

集部
霞外詩集卷五
七至

詳校官中書臣李彤

侍讀臣孫球覆勘

覆校官中書臣朱鈐

校對官典簿臣劉景岳

謄錄監生臣龔輝遠

欽定四庫全書

霞外詩集卷五

元馬臻撰

述懷五十韻

昔際承平久生涯足可憐過庭猶昨日騎竹想當年書
劔辛勤歷輕肥少壯便浪遊春富貴醉舞月嬋娟候轉
芳華歇時移斗柄偏狂歌傷德鳳再拜聽啼鵲敢議乾
綱墜難支國步顛安危誰可料否泰理相連義士含孤
憤謀臣誤大權少微潛在野太史泣占天不起嚴陵釣

空懷范蠡船乘軒猶寵鶴治國昧烹鮮朽木終摧折微
軀忍棄捐天兵威武奮皇澤至仁宣豈意波濤怙還容
骨肉全萬方蘇雨露四海戢戈鋌倦鳥思喬木窮魚守
故淵飢塵貧似范晝睡懶如邊逸翮淹高翥羸驂恥後
鞭夢疑隍鹿在機息海鷗眠喪亂頭顱改蕭條節序遷
行將蠡測海坐待地流泉獻璞悲和泣辭金憶震賢世
途從汨汨王道本平平東魯衣冠盛中原禮樂專遠塵
山出沒大野轍盤旋砧響千門急蟾光幾度圓窺斑嗟

隱豹顧影笑飢鷗古水縈長帶晴雲擘亂綿弓亡元在
楚臺迥亦超燕羽服陪瑤殿天厨錫綺筵域中知道大
物外愧身先歸意驚張詠離居老鄭虔風行猶有待歲
晚薄言還城郭人依舊湖山景自妍艤舟臨斷港散策
陟層巔苑廢移山鬼祠荒謁水仙壤梁殘白蟻舊物失
青蘊落景連村雨薰風一樹蟬野茶伸雀舌林蕨豎兒
拳挂劒尋新塚懷人歎逝川計疎生坎壈道直受逋遺
穴冷拖腸鼠槎依縮項鰯愁鴝休嚇食饞犬誤垂涎葉

在詩三百沽從斗十千舉觴欺大白隱几味重玄淚盡
山陽遂耕無杜曲田苦吟期自放脫藁怕人傳虎變愚
難測龜藏我獨然梅花開又落誰復繼殘編

贈王可受

天上白日苦易傾湖外青山色長好卧沙秃柳回古春
劒脊菖蒲瘦如草大船十丈騰五章絲管嘈嘈故相惱
誰於此理得其全人間久欠眉山老淮陰才子心好奇
忽地入門喜絕倒溼雲吹雨紙上飛急觴一舉開懷抱

看君學業須立成筋力慚余向枯槁靜吟不作西子妍
粉白黛黑盡一掃更待秋風入杖藜與爾西山事幽討

奉酬泰軒蔣明府惠詩集

六義陳國風篇章著三百齊梁變浮靡雅道日崩迫大
厯拯頽波雄鳴破昏惑有如赤水珠妙在心自得泰軒
儒門老赤手探月窟折得芳桂枝月姊不敢惜吞香入
肺腑出語固超特夜久虛室靜淡淡月光白一讀回古
心再讀動精魄乃知天地間元氣運不息高松挺節操

衆卉失顏色小子愧學詩應當取其則

遊淇綠園

久雨今日晴芳意亦可悅前川有名園杖策信步屨主人雅好事高興乃激越長源遡淇水規矩隨曲折開軒遠色至平挹山數疊酌我以金罍餐我以玉屑森爽空光流左右萬竹列凜若隱君子錯磨歲寒節所以賢達人篤靜以修業沂詠且及時春風未鷦鷯興來輒自至興盡即言別相送過河橋青天有明月

題栖碧園

青山多逸士佳處絕囂塵
不是人間世桃花流水春晴
嵐凝戶牖空翠撲松筠却
憶騎鯨客忘言意更真

因話金陀遺編奉呈復齋岳仙尉就叙別懷

宋家王氣久凋零奸櫓元來黨彗星
陷得忠良冤漬骨路人空唾牧牛亭

一簣功成觸禍根忠名還與此山存
寺田廢盡誰能復武穆王家六代孫

王孫德業是真儒
楚楚衣冠六十餘
漸覺令人不好武
傳家惟只用詩書

相逢傾蓋即相知
黜罷星壇祇說詩
今日河橋還愴別
柳花飛雪未多時

雙鶴吟寄友人

依依兩白鶴
歲久住青田
一鶴垂兩翅
飲啄沙汀煙
一鶴展長翮
冥冥自冲天
思之不可見
獨立秋風前
有時月夜羣
動息孤唳一聲
山水碧凝眸
側頸復裴回
影落

空林風露溼故人獨抱經濟才淵珠炯炯光難埋江南
地暖梅花開折花待君君不來梅花歲歲開又落空向
梅邊詠雙鶴

春日幽居和韻二首

吟多頭已白望極興偏長人靜坐臨水蝶高飛過牆疎
簾通草色急雨減花香幾畝山田在歸耕憶汶陽

閉門芳草遍長日付文楸琴潤迎梅雨衣單近麥秋一
春添藥債兩眼只詩愁更欲拈書賣湖邊買釣舟

鷺

水風吹冷逼菰蒲
藕葉歌斜一半枯
玉立鷺鷥渾不動
滿身煙雨看西湖

飲餞交友

何處坐愁思
西風吹客塵
酒餘離岸艣
秋老倚樓人
言道無知己
苦吟空役神
還歌三疊意
慘淡別交親

送鄧蓀壁回師壇

紫府仙人玉練容
偶隨笙鶴下天風
一千餘里梅花外

二十四巖江水東贈別篇章今日賦論文樽酒幾時同
不知三疊琴心裏早晚誰先上道功

和張伯雨見寄懷友詩韻

古道向淪沒世遠懷羲軒哀梧鳳難止惡木陰易繁况
茲雨露濡何以杜本根衆鳥欣所託日暮爭奪喧喧卑
令人瘦曠達寄琴樽士有張伯雨壯歲高誼敦豈無青
雲交秋風過閒門好古既不泯汲汲資討論幸有茅簷
下冬日可負暄所以陶元亮欲辯已忘言

送蔣月屋歸富春

并序

富春才士蔣月屋於大德癸卯冬始予識面一
語合道如平生親予愛其學贍而不矜處和而
節禮故日與青衿之徒誨而不倦凡寄予數詩
皆深入唐人之室讀之使人擊節欣歎今詩家
行輩中不可多得江空歲晚掉頭言歸則世故
可知矣輒成律詩二首以罄別懷回雁春吳寄
書可待

相見即傾蓋生涯同苦吟時情不好古雅道少知音
落年華晚帆懸雪意深男兒無別淚此日亦沾襟

論文不易得此別轉難忘模楷存前古篇章逼盛唐
早梅歌嶺白寒日照江黃家近嚴陵瀨垂釣莫謾忙

至節即事

并序

癸酉歲長至節效王建體偶成絕句十首予年
始二十即一時之事寓一時之意故淪落不復
收今於故篋中得其舊藁青燈三復如對故人

樂天云欲留年少待富貴富貴不來年少去乃
知年少承平之樂誠不易逢三十餘年恍一夢
寐吁予老矣滿簪華髮投迹空林情之所來不
覺涕下故錄于卷末以重感慨云

觀臺雲物已書黃預卜年豐喜倍常萬姓只知行樂處
更無餘事可思量

天街曉色瑞煙濃名紙相傳盡賀冬繡幙家家渾不捲
呼盧笑語自從容

閒看來往坐多時雨灑香塵土溼微珠翠壓頭行不穩
嬌羞兒女把人衣

照席銀山處處同綺羅人坐畫堂中笙簫未動初筵秩
先命歌兒勸冒風

昨夜梅花已報春地瓶移插更精神酒酣纖手爭來折
鸚鵡回頭不敢嗔

已有紗籠照舞兒喧喧鼓籥自相隨誰家院落來呼喚
門外天明也不知

簾旌疊疊繡鮫綃遮護香風不放消却恐酒闌先睡去
預教小玉問來朝

新詞聽徹思徘徊侍女擎羹下筯遲紅燭有花心暗喜
流蘇雙挂玉梅枝

店舍喧譁徹夜開熒煌燈火映樓臺歡遊未曉不歸去
早有元宵氣象來

乾天行健復初陽宮線還添化日長報答升平將一念
家家人靜爇爐香

追別詩友

送客歸來益自驚飄零又覺歲華新
瑤琴絃絕知音在紙帳燈昏得夢頻
江上有家皆舊業門前無路不通津
詩人漸漸東西去誰為梅花報答春

贈梓山桑醫士三首

上下膏肓二豎欺煙霞痼疾我難醫
曾聞適口非良藥劉氏從教未得知

扁鵲秦和久不聞桑君百世有神孫
囊中羞澀胸中富

藥券如山總不論

臨淄古有淳于意
苔水今傳桑梓山
已見高名藏不得
長留詩卷在人間

冬日閑居

世事於人喜漸稀
交游惟寄隱居詩
旋營暖閣延閒客
自斫寒蘆葺破籬
心懶尚餘詩骨健
年高常被鬢毛欺
悠悠此意誰知得
萬里天風雁過時

題節婦崔氏傳後

貞婦抱節操彼蒼何降割志士懷孤忠豈謂靈均奪良
人一已逝大力難回斡依依撫耄稚終作守義活姑死
復厚送兒成固超達萬古如明月光彩不可掇詩罷神
亦驚落日湘江闊

鷺鷥

羽毛疑積雪久立小溪傍只見身不動豈知心更忙眼
迷寒藻色夢結白蘋香應恨魚難得遙天又夕陽

村中書事四首

桑條漸綠雨晴初二月風光似畫圖茅店酒香招過客
籬邊懸出草葫蘆

餉留兒女自喧呼指點春禽又引雛村婦相逢還笑問
把蠶今歲是三姑

軋軋繰車草屋低新篁帶籜出簷齊鶯雛未省逢人避
直向路傍花上啼

神旗社鼓簇林煙野老村童滿路喧但得秋成官役少
免教兒女賣田園

宜興張公洞

嵌巖竒怪復巔岼雲遶香臺奪目寒洞口無人逢果老
石頭何代化靈官泥存丹竈千年迹花落清樽此日歡
飲罷沈吟未歸去松陰露滴楮皮冠

送陳渭叟回山居新隱

問君何事遊春城黃塵不礙雙眼明碧桃開盡且歸去
新宮正待山玄卿

春歸曲

平林靜綠生幽芳
桃脂杏粉攢蜂房
西樓浪客唱別恨
屈卮酒暖珊瑚光
百勞留春春不許
愁觚喃喃如寐語
翠鴉遊女捲香歸
一夜花神老風雨

閑意

落花時節雨冥冥
門掩春風遠市聲
生怕閒人談俗事
自開芳逕寄幽情
團煙野竹侵霄立
巢樹馴鳩傍客鳴
却笑西湖鷗與鷺
亂眠沙觜見船驚

感懷

山南山北菜花黃又做春風夢一場多少亭臺渾不見
欲憑煙鳥問斜陽

送王可受之京

并序

淮陰王可受奇才高義志在四方一旦束書來
杭故流俗罕交簞瓢自若也且夫大塊賦形所
稟則異而分授膠漆者古亦鮮聞僕與可受會
面稀而襟誼合遽爾云邁能亡愴然吁聚散有
常徒感文通之賦出處努力當懷子美之詩輒

成短章少仲別緒車既膏矣夫復何言

浩浩康衢塵迢迢長安陌疊疊經天雲遙遙遠行客之
子當盛年詩書滿胸臆培風搏九萬會見生羽翼翻思
夙昔情對面成脈脈不是臨行不贈言自是愁多言不
得天長水闊無奈何高拍闌干衆山黑

訪山家不值

雲裏掩雙扉何山採薺薇苔痕彌坐石竹色犯行衣露
蝶一團宿風花四散飛靜中觀物理各自盡天機

至大己酉春天師教主大真人俾予佑聖觀虛白

齋高士謹裁七言律詩一首辭謝

盤空獨鶴下仙壇
紙上春風墨未乾
駕馬斷無千里志
鷦鷯惟羨一枝安
青天蕩蕩玄恩大白髮
悠悠世路難容得
閒身老林壑
湖西山色倚樓看

雜詠六言五首

堤晚遊人爭渡花
密流鶯亂鳴近水
亭臺柳色轉山樓
觀鐘聲

半村半郭幽隱不羈不束閒身無利無名到念有詩有
酒酬春

煙外幽人獨立落日正照平臺野鷺聯翩飛去山雲斷
續歸來

楚尾吳頭舊夢水邊山際閒情一夜杏園風急等閒吹
老鷓鴣聲

野渡綠波芳草落日青山杜鵑多少臨歧別恨送君歸
去閒眠

地幽

地幽無客過閒居種藥荒園手自鋤湖海故人何處在
十年僅得兩回書

聞蟬

短翼含風薄似秋一聲聲帶夕陽愁年年古柳官塘路
催得行人白盡頭

涼夜

漸喜親燈火更深獨坐時一庭涼雨歇百種草蟲悲吾

道思浮海人心似奕棋
昭文琴不鼓何處覓成虧

晴湖

晴湖闌檻外坐憶十年遊
吟靜得新意人閒生古愁
高煙羣木淡遠水亂山浮
幾欲乘流去鄰家有釣舟

為松瀑黃尊師作溪山疊翠圖

平生固多愚懶墮足棄捐
賴有詩畫事與物相磨研
恨無鵝溪絹幽意鬱不宣
秋晚形神清落筆且周旋
尺素混太古象具剖闢先
溪山忽重疊浩思浮雲煙
樓觀金

碧開衆態敷幽妍秋色挾以至高風生樹巔羣有備一
幻孰謂理不然老耳厭喧卑但覺靜所便幸遇古君子
締此翰墨緣見山有真意淵明得其全

九日

把酒且酬重九節龍山會散幾斜曛嘲詩謾憶孫廷尉
落帽今無孟府君冉冉黃花從古有寥寥清事更誰羣
高秋大笑人間世我亦天涯一片雲

水軒秋眺

幽軒駕平湖納納縱秋望目極心自遠頗覺脫塵坱融
雲積白黑詭怪出萬狀山坳日色破川光亂流浪庭桂
復憐人稍稍金粟放豈無數日好為我發清曠花落有
時榮我老無日壯幼逐心境移了識死生妄委順夫如
何忍使靈物喪回首送扁舟孤燈照漁唱

飛霜歌

飛霜悴百草芳蘭亦委柯縱欲努舊力奈此寒風何在
昔結花初豈不受春多恥隨桃李場託迹空山阿四時

有代謝陽豔忽已過薰蕕苦不辨一體同消磨不如壯
丹根密幄相遮羅傷心復傷心傷此飛霜歌

旅夜

自慚身世拙客裏更關情月樹回涼影秋聲疊夜砧道
能忘畏壘酒不破愁城睡薄吟魂冷西風亦屢驚

寄澈川楊如山

吾聞沙丘之馬黃驪牝壯世莫知九方臯去不復有天
風吹我滄海邊忽地相逢釣鼇手論文託契輸心胸傾

倒金樽斟綠酒登高望遠古意多百年之樂能幾何男
兒屑屑志不展秋霜滿鬢空蹉跎酒酣眼極情未畢笑
指青山歌落日却憐徐福向蓬丘蒼蒼煙浪無消息明
朝挂席我歸來西湖十月梅花開梅花開動詩思思君
不待春雁回因之一寄平安字

送徐芝石之饒陽稅使

別袂分吳地之官及楚鄉還聞稅斂薄會見姓名香山
晚雲侵樹江春燕語檣公餘詩思好風月屬鄱陽

春日獨坐言懷

昔日歡娛憶此身，名園歌舞接芳辰。
蟄雷夜送催花雨，香逕春迷鬪草人。
合沓樓臺形勢壯，風流鶯燕語言新。
眼前舊物渾狼籍，休怪提壺勸客頻。

寄題皆山樓

仙人好樓居，縹緲半空立。
吐納萬里秋，回合數州碧。
倚檻足吟嘯，四面嵐氣入。
下視塵土中，日夜風雨急。
處士種茶處，髣髴白雲溼。
何時一登臨，啜茗坐終日。
會待飛

蓬山清風生兩腋

桃花

淺碧繁紅又滿枝
化工消息本無機
豔滋曉露鶯搖落
香漬春泥燕掠歸
金谷園中芳草在
玄都觀裏昔人非
自從雲隔天台路
劉阮如今夢亦稀

閑中書事

不甘老眼坐相欺
抄盡窗前近作詩
因理舊書傷故友
偶經閒事憶前時
綺羅香散春風老
鼓角聲來夕照遲

咫尺青山歸未得可憐辜負白雲期

送張仲美之黃陂縣令

夫子先流輩之官冰蘗清吟高存雅道歲晏識交情天
路飛鳧下津亭候吏迎黃陂嘉政在汎愛入琴聲

春日寄友人

聞道西山春事稠一年能得幾回遊莫教桃李虛開盡
準擬百錢懸杖頭

行春

行春無侶自遲留汀草汀花暖更稠馬接近來成矍鑠
謝安應合減風流乍驚語燕穿人屋無賴遊絲絆客舟
老我光陰忽如此不判樽酒復何求

無營

宇宙春風起無營只閉關魚龍超化日猿鶴戀空山去
浪溶溶外飛花擾擾間人生謾多事不及嶺雲間

送桐廬徐教諭

詩禮名家積慶餘桐江文掾著鞭初不惟鄉里能稱善

轉使兒曹愛讀書
芹水春香心自得
萱堂日暖喜何如
却憐垂白嚴陵老
萬頃煙波學釣魚

題彈琴畫卷

伯牙彈古調
沖淡心天倪
六馬猶仰秣
其朕乃得窺
至音存至寂
未必鍾期知
昭氏在不鼓
然後無成虧

世情

世情人事兩蹉跎
一夜西風掠燕窠
不見襄陽于節度
青山空羨白雲多

雙鳳普福觀瑞芝

雲朶絲金疊幾層似聞雙鳳遺瓊根潤浮玄圃煙霞氣
色凝天壇雨露恩綺皓欲尋還有約橐駝雖巧未須論
由來福地多祥瑞萬歲千秋祝至尊

寫意

諸機忘已盡魚鳥日相親移竹喜逢雨訪人愁問津杖
藜徒步弱行李索居貧未遂平生志長懷鄭子真

山中重九二首

忽忽九日至幽致饒山家石根去年菊復作今歲花弱
枝不自立彫耗相交加恐爾霜風來寒英委泥沙流日
不相貸袞袞天之涯登高豈無人所欠惟益嘉且就菊
花飲寧復空咨嗟

東籬菊花開每憶陶彭澤今人非昔人此士難再得隱
几盼庭柯不語心惻惻遙憐柴桑里千古南山色

秋日閑咏二首

西湖晴雨畫圖間坐倚闌干自解顏無酒可供千日醉

有錢難買一生閒
草衰春色來時路
鶴宿秋聲起處山
橫笛吹殘天又晚
釣舟燈火入蘆灣

湖西日落湖東陰
湖邊樓觀環蓬瀛
孤山雲氣出亂樹
六井水流通古城
土風猶祠李相國
菊泉誰薦蘇端明
我有新詩弔萸景
景昏日短難為情

蟹二首

最憐生沮洳
畫手亦曾摹
郭索趁船火
爬沙出岬蘆
旁行知性躁
實腹任腸無
張翰思歸興
當年誤憶鱸

慣穿籬落罅邊來名負橫行誤被猜水國霜微初上籬
沙田稻熟已朝魁因傷煦沫依筠籠忍見持螯薦菊栢
籍籍禮經曾載入臨風吟詠獨徘徊

贈鶴泉丁處士

海鶴傳書謁洞天少微星已照林泉步兵未合判長醉
執戟終懷草太玄清唳一聲孤嶼外飛流千仞亂雲邊
小山叢桂能招隱細把推敲問浪仙

就前韻寄翁子善

已斷平生不問天
流年混混似原泉
短檠事業拋儒素
老境光陰味道玄
池草又生春夢裏
野梅閒落暮愁邊
羣書讀盡成無用
自課青童小學仙

奉簡黃瀑翁求示病懷賦藁

志士抱幽獨
病懷吟楚聲
聲悲多激越
天地慘不明
中有孤直氣
叩之金石清
金石無變質
形器非常名
是身闕不有擺落
大患嬰所以
南郭翁存此
隱几情清商
切暑勢陰陽
遞相傾攢攢
得失根寵辱
盡若驚保守
堅貞

節糾結歲算盟願君枉來章讀之平不平

自適

螢雪無功志已違此身堪笑復堪悲
爐中化藥慵求術夢裏逢人也說詩
固節謾教貧女媚背時翻學小兒癡
百年傳舍終塵土多事楊朱泣路岐

送恩斷江住平江天平寺

雲門和尚舊家風聞道宗通說亦通
佛法悟來曾徹底江流截斷合朝東
指頭龍象叢林喜句裏乾坤大藏空

想得禪餘詩興好鐘聲半夜月明中

春雨寄興

尋芳每恨出郊遲白髮看春亦自嗤
待得雨晴無暇日年年說過落花時

暇日偕林芝巖數詩友清遊分韻得山字

地僻幽棲絕往還門聽佳客喜開關
觚稜轉影日過午鷄鳴不鳴春滿山
萬古乾坤詩卷在百年身世釣舟閒
玄都道士休愁思為報劉郎鬢已斑

小軒晚望感懷

依依城郭在耆舊盡凋殘
赤水求珠易青天繫日難壯
遊多入夢落景獨憑闌
歲月無情極相思煙水寒

霞外詩集卷五

欽定四庫全書

霞外詩集卷六

元 馬臻 撰

嗣師總攝吳真人奉旨乘驛遠詣龍虎二山等處
崇建金籙大齋庚戌仲夏十有四日抵抗四聖
延祥觀慶成典禮復被綸音回鄱陽進二親國
公夫人之秩千載盛事道俗交歡敬賦七言唐
律二首言賀

翩翩羽節午風微
夾路人看畫錦歸
丹詔紫泥傳象闕

寶冠金帔勝萊衣九天飛奏通齋典三日開晴應德機
要與東吳留盛事悠悠吾道發光輝

榮際三朝昔未聞暫將飛鶴下天門詞源久仰文章伯
化圃今瞻道德尊雨露松椿推極品金湯冠褐戴深恩
晚香堂上薰風細藹藹歡聲入壽樽

送張仲實赴姑蘇教授

夫子才難數斯文道益尊調官之魯類理棹赴吳門詩
價璫璵重家聲禮節存聖朝敦養士薦美荅君恩

送陳渭叟歸山中

人生少至百一別動經載不信歲月馳請看容鬢改先
生本是超絕人長竿學釣清渭濱釣頭不解挂芳餌岸
草汀花空復春大魚小魚求不得芒鞋忽厭人間窄手
攜詩卷出萬山來覓湖邊閉關客終朝相對百不為口
中咄咄唯言詩飛花濁酒日色靜天地悠悠知者誰興
盡翩然即歸去鶴巢雛在門前樹他時我亦訪君家但
問青山白雲處

閑居自遣

喜無軒蓋歎柴荆，靜裏天機見物情。
德愧王良千里馬，食無婁護五侯鯖。
海翁豈為鷗防慮，稚子休烹雁不鳴。
一笑行藏頭已白，新涼又到讀書檠。

舟中即事

家住西湖楊柳煙，歸心一片逐帆懸。
推蓬試聽舟人語，正在鴻飛阿那邊。

湖西分韻得西字

詩成曾在酒家題記得西湖更向西洛社交游雲斷絕
梨園歌舞草淒迷年華老去心猶壯世故紛來物不齊
行盡長堤理歸棹槿花籬落夕陽低

秋霽

雨久喜新霽曠懷歌薄遊鴈經孤驛暝雲入亂山秋落
葉無時下啼鳥有底愁年光與心事盡逐水東流

歲暮偶成

古人不可見養拙謝時髦隱傍淵明柳飢懷曼倩桃鑿

坏誰敢望抱甕豈應逃義見馮公偉仁依范叔豪乾坤
心浩浩江漢日滔滔老境誠難料繁荆未易薶親朋隨
宿草歲月捲秋濤夜短難籌促天寒象緯高燕情傷局
促松節感持操姜被流離析鄒裾揖讓勞亂雲迷鶴路
短髮問漁舫念與追攀絕心辭寵辱熬世情甘木石我
輩豈蓬蒿萬事差池裏長歌對濁醪

送楊仲弘之京

迢遞官塘官樹陰征鞍催發短長亭荆吳雨漲河流白

齊魯春歸岱嶽青
玉宇風雲開北極
金臺日月聚文星
近聞下詔求賢急
劉向終須論五經

泊然暢學士將之太平
出示竹齋安大參見寄
詩屬余和韻

山樊歲晚締梅兄
恬憺相看足古情
湖上舊遊經幾載
吟邊心事記三生
清標野鶴昂昂立
高論長河疊疊傾
正是太平風景好
雙旌五馬試春行

祖瑩春祀賦雜言

平湖納衆壑茲山亭紫冥吾祖飛鳥去遺蛻局佳城思
之感節序泫然傷我情莫教綠髮愁中變百年人事山
鶯囀天邊明月來古今無復延陵懸寶劍青春不作松
下人年年空掃松間塵松風蕭瑟不忍聽且將美酒澆
青春親朋談笑分餘昨蝴蝶不來芳草算路傍遊子矜
少年拍手揚眉唱歌去唱歌去入誰家請看昔日朱門
今野花風光盡屬官蝦蟆

籠鶴

曾隨阿母宴瑤池野格昂藏不受羈側頸鸞凰那有待
能言鸚鵡莫相嗤九臯月冷歸何日三島雲深夢自期
誰惜天風舊毛羽瘦梅花下立多時

松鶴吟寄儒魯山

寒松屈鐵骨氣聚丘壑陰老怪不適用庶脫斤斧侵東
風飾草木衆色自成林似聞孤飛鶴斂翮遙相尋鶴性
負高潔松色融古今臭味既不殊未見情先深素琴三
五絃中有太古音太行本不險行人自欺欽願持寒松

操寄此孤鶴心復恐不見信遂作松鶴吟

寄葛川高子長

春風巷陌喜逢君歸計無端阻重尋恨別不禁啼鴉晚
到家應是落花深出門送客山當路隱几讀書松滿林
自笑白頭城郭裏釣竿空負五湖心

送黃瀑翁回龍虎福地三教名流飲餞分韻得醉
字又得大字

春來幾何時草色泛空翠如何百年中聚散若交臂衆

賓羅高堂把酒叙別意別意不在酒已為六經醉後會
定何時更待秋風至

幽獨一寸心閉戶學懶墮自非簷雀乳詎識青春過每
懷彌明師文墨日牽課一朝動歸興我亦北窗卧遠意
不可將花落風雨大

臨岐叙別

吳山蕭瑟吳雲陰臨岐送別還沈吟不愁聚散易反掌
但恨輕薄難論心流年鼎鼎素髮短歸意拍拍青春深

江中釣得一尺鯉莫惜書信來相尋

挽徐澹軒

璧水衣冠舊有聲
芹宮三仕已忘情
承家德業存誠敬
落筆文章法老成
汎愛能全饑饉活
流芳還見子孫榮
生芻一束人何在
道悅堂前月自明

屠存博偕詩友見過分韻得涼字

院靜朋簪盍吟清
夏日長道同忘爾汝
俗薄任炎涼
林木鶯雛鬪湖風藕葉香
鹽車多服驥不必待王良

新涼遣興

山水光中屋數椽
治生無術晝常眠
詩成好句敲門說
藥遇奇方信筆傳
漸老一身体問卜
未來萬事只憑天
西窗昨夜西風起
秋在歸鴉落照邊

冬夜長

寒房夜久燈如珠
新霜薄薄鋪堦除
擁衾敗纊不釀暖
萬感鬱沒同鰥魚
隣雞努力催殘漏
飢鼠啁啾壁間鬬
可憐心事誰得知
愁殺梅花月中瘦

和仇仁近歲暮見寄韻

瑤琴三疊此心閒
目送飛鴻信手彈
千里故人行自遠
一聲白雪和應難
賀公歲晚稱狂客
鄭老才高只冷官
且向吟邊了身世
西山暮雨捲簾看

挽清軒屠武翼

槐陰舊夢不須論
餘慶終歸積善門
負郭無田耕化地
傳家有子受皇恩
并將白社肩隨盡
記述清軒手澤存
德業既脩芳緒遠
一經還擬教諸孫

春意二首

空堦重疊長莓苔
春靜閑門晝未開
江上故人終歲別
柳花飛盡不歸來

春來藥果不曾疎
手內枯藤尚未除
病起無端添懊惱
壁魚蠹盡一床書

春日客思

天地羈情薄
江山幽事稠
人煙成小市
風雨住行舟
野色城邊斷
春華水上浮
歸鴻緣底急
衮衮過西州

挽淵德周真人

昔別西池下九霄雲龍風虎際逍遙已瞻母教推慈訓
載育師真顯聖朝姑射謾傳年穀熟易遷難擬些詞招
金支翠節知何處望斷秋煙凝不消

送張子微赴鄱陽學正

士有張子微早歲已識面蘇杭一葦間白首復相見
息相見又何如云今欲度鄱陽湖鄱陽多士森琪琚
先之德行隨詩書子率以正孰不正斯文千古師嘉謨
白

蘋昨夜秋風起八幅蒲帆泝煙水鄉間得士早歸來高
名已動青雲裏

越上感懷二首

曾負琴書到越中別來三十五秋風江山有待容回鴈
歲月無情類轉蓬禹穴荒煙寒木老鑑湖舊水野田空
騎鯨人去知何在擬向沙邊問釣翁

人事浮雲易變更越江如帶遶寒城千年舊夢青山在
一曲高歌白髮生馬首交情分曉渡鳩邊村意傍春耕

東風歲歲吹芳草金粟堆前綠又萌

錢清劉太守廟

旌旆千年去不還一錢誰信重丘山使君有廟絲清政
俗客過門合赧顏鄉社雞豚風物好歲時簫鼓水雲間
殘碑讀盡無人問日暮隣翁為掩關

蕭齋

怕侵塵土氣種竹護蕭齋吾道似無味人生嗟有涯日
光穿壞壁鴈影落閒堦衮衮百年內勞生非我懷

春日陪數詩友酌磐隱墓分韻得走字

杖策隨躋攀欣此方外友
蹇英陟崇岡雨滑徑未取撫
事骨屢驚攢眉酌親舊蕭瑟山門風委曲瓦盆酒僕夫
致筭巖行厨竹間走人生縱騷屑金石亦銷朽具論夜
旦理萬古破聲聒初聞子規叫于今未絕口扁舟問歸
途放歌出林藪窈窕松聲長憂來錯回首

憶孤山

自從梅樹委荒煙湖上風光不直錢
見說年來春好在

擬攜樽酒報啼鵑

黃濬翁遠寄佳篇就韻奉和四首

去帆張別恨極浦引餘情
千里故人遠尺書雙眼明
乾坤隨闢闔雲物偶逢迎
幾欲傳回信黃梅雨未晴
飲餞鶯花日懷歸雞黍情
園蒿憐仲蔚石鼎憶彌明
鄉老吟詩別篙師倚楫迎
秋風正相待不必問陰晴
風江塵漠漠野日草離離
雲隔吳山外春歸楚水湄
公惟避俗墨子謾悲絲
人事多翻覆長懷招隱詩

初月照遠意向人光陸離夜華沉木杪河影薄天湄習
靜存丹火謀生理釣絲思君望不極翻讀贈行詩

送草池謝法師之京

求賢遙捧檄浮海遠寧親豈意金門客來盟白社人聽
鶯懷桂館轉鶴覲楓宸林壑生生意還歌帝力均

送善之鄧學士被旨之越書譔大禹南鎮二廟碑
記

遺廟稽山歲月多負舟龍去事如何北宮視草重修記

南鎮因方復共科片石文章光日月九功風化浹山河
絕勝逸少誇才思只寫黃庭換白鵝

雨窗懷感

江湖積陰雨四月如涼秋我室空四壁風聲為颼颼短
褐久已弊敗續幸不收况茲蒲柳質賦性多謬悠不義
取富貴未語顏先羞稱善在法則古有馬少游平生急
難人青春卧林丘此道付寂寞有淚如泉流世議限迫
阨冲和喪雕鏤鳬鶴互相笑所見竟不投泥龜樂曳尾

煙水盟馴鷗棄置勿復道俵俵非我求

夜吟

靜吟松影裏抱膝久淹留衣透一身露心冥萬里秋聞鐘如有省見月未能休此意應難極尋閒不自繇

寄太平使君暢學士

天下英才不易得中原復見文章伯扶搖九萬始一搏大鵬不是籠中物君侯昔著宮錦袍集賢如堵看落筆花磚日過草萬言暫勞牧守皆餘力去年傾蓋西湖邊

義薄層雲如古賢摩攏風景陶大白醉看俗物都茫然
孤山處士呼不起梅花樹老咸平煙自從別去生幽恨
心上流塵欲盈寸山重水複夢難通每辱書郵數相問
采石江頭月色新一樽還酹謫仙人太平無象今有象
政化已及民風淳平生得意真天真但懷後會殊無因
霖雨八荒應爾待鳳凰池上柳條春

送新城賈宰

門堦閒寂晝垂簾重疊青山遶縣前政及鳴琴方百里

化均馴雉已三年姓名不待公卿薦世業皆持將相權
他日人來問民俗去思碑在浙江邊

漢景帝紀

道存恭儉接前王民自熙熙物自康已見竇嬰申漢約
長星不用出光芒

寄黃尊師

岸花開盡木芙蓉雨意分涼到水荇比似高眠消永日
試來湖上看秋風

倚樓

徙倚西樓倦眼開古今人世一傷懷
雲將晚雨飛平楚鴈帶秋風過兩淮
可但學詩無孔鯉空聞志怪有齊諧
固窮自是尋常事蔬食聊從祭祀齋

挽詠沂翁縣尉

故家喬木已淒迷白髮衣冠只舊時
貧樂簞瓢忘世味老將書籍課隣兒
藥囊病久無方効薤露情深得句遲
遺藁有傳真不愧殷勤說與九原知

春遊

呼童提攜老瓦盆杖藜遠遠敲柴門
野芳幽草煙斷續流鶯乳燕春澗翻
山深自有古意在日靜不知人事繁
花開花謝一如此身外得失誰能論

呈達卿焦使君二首

維摩隱几非干病病為民心病未平
五馬揚揚風化首且將仁惠及蒼生

道人慵懶久忘機畫戟門深每到稀
昨夜床頭薤菜老

飽眠閒看白鷗飛

送善之鄧學士之國子司業

階州紫水進新泥
喜聽除音下玉墀
只合文星依帝座
還於錦里得儒師
揮毫作賦春雲動
委珮趨朝曉漏遲
想得誨人應不倦
諸生館下立多時

春日幽思二首

閒看兒童鬪草歸
三三五五自相隨
老翁也趁堦前坐
笑指飛蓬滿鬢垂

溶溶池水夜來添一雨生寒似去年飛盡柳花無好句
却移詩思在荷錢

陪吟友山行分韻得山字

春郊有幽致不在桃李間解后得三士緩步隨躋攀玉
泉古招提題詩憶香山信此流電身區區亦何顏一閒
乃自棄造化未必慳且復理歸棹日入相與還

和仲實張教授除夕詩韻

春入屠蘇酒味輕燈前笑語待天明詩應神助筆初試

癡任人嫌夢却清紅豆粥香分餽餉金花勝巧耐逢迎
年來歲去關心事怕聽隣家爆竹聲

挽黃松潭二首

紛紛世事厭炎涼白首書林夢一場月冷夜長驚弔影
江空歲晚鴈分行臨終覓得驚人句留別親傳教子方
惆悵九原春草綠勒銘誰為發幽光

悲涼舊事已難論唱和詩章滿篋存風雨市廛多白眼
妻兒燈火幾青樽玉樓有召能成賦蓬海無香為返魂

處士不歸玄鶴去孤山梅老月明村

題淨慈叢玉軒

招提雄壓南屏山李侯筆底叢竹蟠風香細度白簷
葡萄秋影森立青琅玕瀾翻醉墨光凝鐵不受玄冬雪摧折
室中老子心亦空白髮相看眼如月

詠田橫二首

漢家天子詔遺臣恰是恩多慮轉深忠義自能輕一死
可憐門客盡同心

海日荒荒海氣涼一思前事一心傷
絲來匪石終難轉
不是將軍畏鄴商

送希真鄭尊師回新州洪丘山舊隱

志士涵正氣不露荆虹輝
一逢龜臺人慷慨脫繡衣去
冬來江南還尋舊游處
楮枰聚談玄愜我平生遇
天地本不老江山生古情
春風動歸興散入流鶯聲
洪丘山上雲錢塘江中水
滄江日夜奔急流只有青山
是知己
歸去來歸去來白雲滿山
花亂開

挽俞古梅三首

力盡穿楊事可悲，棲遲城郭自儒衣。
青燈夢寐功名遠，白髮光陰志願違。
死悟潰癰皆幻化，學窮大易到玄微。
案頭書卷塵狼籍，珍重東床為發揮。

西湖遺老盡銷磨，屈指如君數不多。
聞說篇章常見許，每逢休暇即相過。
膏肓病證無良藥，生死交情入感歌。
為問梅花全古節，歲寒心事欲如何？

古言七十人希有，惟恨朋簪失典刑。
註易麻衣才脫藁，

讐書光祿罷傳經

未化前三日夢中
言詩記此二句

高門已繼中郎女

後夜虛瞻處士星岑寂南山山下路綠陰黃鳥不堪聽

贈心山

真宰凝空無靈樞運百體顏子契坐忘淵明得真止妙
感潛至寂詎作死灰擬風雨撼不動疇能計終始

送姚江村回高安

聖賢法大道二氣調闢闢所以稷契心妙與古先合載
聞盛明世總總任英達夫子璠璣器聲價久合沓迎師

不憚遠遂下陳蕃榻聖經光日月接要延問荅始知經
濟材硯利若新發斯文藉彌縫善建固不拔錢湖舊游
地即事傷素髮木落洞庭波商氣倏蕭颯緬懷千里萼
已覺寸心渴余哀矍鑠久送遠乏挈榼清江浩茫茫扁
舟待明發

送達卿焦使君

疇昔相逢事壯遊盍簪人物盡名流蚤登霄漢辭朝列
老向錢塘作郡侯井邑民歌千里月河橋客散數帆秋

西風滿耳蟬聲急明日思君過別州

冬至即事二首

今日陽初復比隣相賀喧門深車馬盛筵秩管絃翻華
屋皆新主寒梅只故園
鴈仍得意飽肉但飛騫

結屋傍湖水對門三四峰心灰無復煖鬢雪近來濃孤
雁雨中過短書燈下封平生故人意衰老不相從

高樓晚望

徙倚高樓今古情暉暉晚日故留人真傷令節經冬至

細數行年又甲寅
樗櫟此身從物棄
江湖舊友得書頻
濁醪未必消愁絕
為見寒梅發興新

溪月王真人被旨入覲謹賦五言六韻詩奉餞分
韻得在字

天地鼓橐籥道備域中大彌綸
宇宙間妙寓無不在
真人體道用翊教際明代飛書下
寥廓指鶴促行邁
游雲澹微霄涼飈引虛籟
二月江花開回車定相待

為北村湯同知題畫卷二首

山人慣識山中趣來訪山家陟山路轉頭萬事總不知
只有秋聲在高樹

黃塵浩浩昧人目怪石急流生野姿溪橋不放車馬過
山頭樓觀秋參差

不眠

不眠今夜月為我照書堂古木移長影飛星引細光歲
華行漫與人事日蒼茫自愧忘機客蕭蕭兩鬢霜

歲夜

喧聲爆竹九街傳
瑣瑣悲歡又一年
魍魎已驅儼有道
屠蘇先飲我無緣
傍人燈火真相向
殢食兒童強不眠
休說開元舊時事
長歌短髮易淒然

題畫醉

曾入咸平處士詩
溫存還向畫圖披
須知小草難真醉
飢鼠跳梁莫謾欺

擬常建題破山寺

古寺破山色入門松
竹陰雨花傳祖意坐
石契禪心潭

靜白雲上月高清楚沈幾時辭一尉尋社入東林

讀漢明帝紀

穆穆中興禮樂風雲臺諸將已論功如何海宇塵氛靜
至死無人說祭彤

題鶴泉圖

我聞匡廬之山青入天上有瀑布千仞懸嵌空金碧根
高源噴薄直自太古前未知鑿開混沌竅神物茫昧誰
之然翩然皓鶴來何許心融恍聽泠泠語云是遼城丁

令威玄圃崑丘曾一舉為嫌天上多官府偶向人間值
風雨稻梁與魚蝦瑣細不足數空餘舊標格燕雀莫敢
侮令威令威我欲從之遊天風萬里冥冥秋力小羽翮
短六合安能周乃知搏鵬鷺鳩各有分不如榆枋飛躍
棲林丘

和仇仁近教授見寄詩韻

君詩如錦我難如為報交朋遠寄書爆竹又經椒頌獻
浣花終卜草堂居百年過眼春排遣萬事傷心酒破除

白髮滿頭還自笑一筇風雪出無驢

霞外詩集卷六